

紫園草卷十一

衡郡曾朝節著

祭文

南嶽告神文

衡嶽為南山之宗凡山之宗於衡者一草一木皆其
生之也而况人乎以節之不敏生於衡之支邑而復
常遊詠七十二峰之間萬分一有知皆神牖之節何
能忘所自哉頃者叨官翰林獲以使命經行嶽山之
下念神之德無所為報而第以辨香展過廟之敬焉
方今

聖君賢相坐臻綦隆之治佑助之功寔在於神然楚
邦旱蝗歲有災沴相襲幹運造化阜蕃我邦之人神
得無意耶節又有所私籲於神也老母今七十有二
歲矣節奉之京師養也間關萬里心隱隱思焉壽考
康寧之福皆神所司于以庇我母子令侍直之暇常
得斑斕而舞此人子之至願也節毛髮亦種種矣嗣
人尚缺宗祀關之神以好生為心而精靈儲蓄往往
不盡鍾於物而鍾於人魯以一尼丘禱而聖生節今
固禱於嶽神也神之垂聖慈於節曾不可比於草木
之生岡阜耶允惟宗山而嶽產者擬之子姓故屑屑

然以私情告尚饗

濂溪先生祠石鼓告文

惟先生主靜立極無欲作聖光霽傳神圖書垂訓邈
考往牒鈞遊此鄉石鼓有祠曠缺蒸嘗某等徼靈得
請肇陳俎豆仰止儀形式先先後名賢並列舊邦勝
區萬禩祇承精爽蕙如尚饗

白野朱先生祠告文

惟師孝友作楷清白標範顯晦同操始終一貫人倫
歸德矩矱在茲負笈擔簦雲集當時講授經義旁通
曲暢群飲江河各充厥量性命之論繩墨之言時雨

之潤春風之溫教成於鄉通籍朝宁踐更中外勲猷
茂著秦關作伯解組歸來色笑粉榆典刑忽摧官轍
所至謠頌尸祝愴我及門大招可續有祠輪奐想像
樞趨蘋藻潔清酌奠踟尚饗

告祖墓九首

我祖肇社茲邑吉壤天畀自元之季迄于今斯子孫
繁昌靈瑞乃發追惟玄德之遠遺用溯本源於水木
瞻望瑩域敢告潔虔惟我祖尚終佑之

天耀隱德發祥地靈爰及五葉我祖肇生天佑我祖
生促嗣延吉壤在茲凝祉曾玄楚粵之交嶽勢既紆

青嶺嶺海鮫鯉扶輿脩巒周環翠岫遙列川滙山迴
元精融結駿發今斯食指既繁科目迭興濟濟衣冠
節忝詞垣繫祖之庇歸然封塋敢後瞻對靈瑞千禩
翊贊勲猷郊麟苞鳳似續弓裘祖德怙恃宗祊永昌
酌酒虔籲鑒此馨香

嗟乎忠孝節義四者皆人之所難天苟報之必於其
後然臣忠子孝夫義彼丈夫耳閨閭之儕乃能矢志
茹辛以成其節豈非人之所尤難而天之報之宜何
如哉昔我太高祖踰弱冠遽厭世我太高祖母誓死
當年忍恨撫孤卒之孤成咸享壽考德存後嗣豈非

天之所以為報耶其幸使歸瞻依封樹重有感於尤難之節為後世庇加戀慕焉尚惜其無從表於世也憶我高祖安安太高祖妣之靈於茲堪輿家咸以為吉乃自初厝子孫蕃衍以能歲脩常祀久而彌延則風水之談尚矣然非太妣夙有賢行克昌後來亦曷能種善貽祉而享其遺澤也奠域靈區抑亦佑助善人者乎頃者使歸寔勤瞻慕酌酒告虔尚冀佑之我曾氏定宅臨陽上世遐邈其德蓋弗可得而詳云或大王父之祖蓋蚤歲即世太母劉茹苦堅志撫二孤成宜以貞節旌當其時未以聞今世遠事湮而不

可圖矣大王父之考則壽最高風誼傾一時數請邑鄉賓其德今子孫猶傳之也以是克生我大王父始振其家既以贊雄而猶扶義好禮為邑中間里之傑至於今亦久遠矣猶蒙其遺業而未泯焉某之不肖乃荷祖德之所累積叨塵侍從豈敢忘所自來哉頃者使歸瞻溯先德爰述其事以申告於墓亦惟大王父鑒佑之

我曾祖樸茂淳固慕義宅仁誼重鄉閭德延後裔其承啓佑濫廁詞垣幸還里居不勝感慕爰奠清酌叩於香冥惟我曾祖欣佑之

節侍吾祖龍山府君暨吾祖母何之側則常稱曾祖母之賢行及舉其垂絕之語今其言若猶在耳也嗟乎我曾祖母之賢與我祖之孝世未有傳其事者焉至于今日諸孫之有成立稍稍振其家聲我曾祖母之語不誣矣其幸奉使來歸爰酌清酒申虔告於墓乃有感於遺訓重述之焉

嗟乎我祖父忠信正直自其性然幼不好弄與俗異所與接務繩以禮不即而斥責之弗諱卑幼凜凜見未嘗不跼踖思避也至以訓吾子姓尤甚必當意乃色喜邑中稱訓子姓無嚴於吾祖父者節嘗憶在童

子與他兒群絕不善與之嬉年十五六惡言未一出於口非其性能而吾祖父寔教之然耳迨後督節舉子業日歧而待成立蓋親見節與計偕十年竟蹶南宮第以負其志節之鈺劣蹇拙罪復何追矣乎又十年而節始為史官則墓木拱矣頃者奉使歸瞻望瑩域潛然流涕不勝風木之感爰酌清酒申虔告於冥漠惟吾祖父尚歆而鑒之

嗟乎吾祖妣之賢蓋不可勝道矣龍山府君剛毅挺直祖妣則用柔濟以能睦族黨善姻婭吾祖訓諸孫學嚴甚祖妣則慈外憚祖父嚴而內悅於慈然不為

姑息之愛時時督之曰汝等第務學勿令汝祖父知汝惰吾不汝庇乃後節等知嗜學則俱之郡城遊不恒在膝下矣在庠序八年與計偕十年所歸而省侍家庭大率二三年而始一耳何謂遭頓迺否復十年始為侍從官徒有不及見之憾乎頃歸在里瞻望塋兆潜然涕下不勝風木之感爰酌清醴申虔告於冥漠惟祖妣歆而鑒之謹告

焚黃告先考文

嗟乎痛哉自府君携諸孤來郡城學則不肖孤最長拮据而督之學獨專意殫力也所冀幸旦夕成立視

若左券豈謂計偕二十年始上第哉以不肖孤蹇鈍幾失而竟得之叨侍從稱近臣日廩于太官可以其旨甘為膝下歡乃侍食母側每徒思慕哽咽而不能甘也即沾祿惡在其為意得哉然猶賴府君靈上第之明年恭遇

皇上大慶恩覃於在廷臣工如例褒贈府君

制詞煌煌照耀丘隴無極以重為種德訓子勸也則豈非不肖孤之所藉以舒沉痛於萬一哉

命初下已令諸弟某等改題神主於家至是孤以岷吉二藩之役還里始克具冠服書

制詞於墓前焚焉惟府君其鑒臨之謹告

鄉賢祠告弟涵齋文

我弟夙稟至性德成粹温分席俎豆垂勸後生頃還
瞻溯宛然心神薦藻祠下涕泗縱橫

李文正公懷麓堂祝文

惟先生震代文章先朝元老不隨不激亦智亦愚後
世仰其清風相業垂於國史某等桑梓後進追慕典
刑邇音容邸第之存羞蘋藻仲春之屆精靈不昧歆
此潔虔

移顯妣主告文

不肖男節不幸母慈背棄扶棺
寒暑頃獲新營里居將奉四代神主
嚴祇事禮大
葬之後祔主于顯考寓舍靈几亦遂遷移既舍舊以
從新彌悲愴而泣血惟冀慈仁歆鑒微悃允依顯考
綏我思成不勝摧裂瀝誠控籲謹告

奉安四代神主告文

不肖某聞之將營宮室宗廟為先冢子主饋奠禮尤
宜之今以草土之餘為居舊宅力不能特建祠宇以
奉宗先因陋就簡姑為四龕置四代神主于寢室之
中庶以遵脩歲事陟降于庭惟我高曾祖考妣歆饗

寸私蕃昌後嗣子子孫孫勿替引之以先妻贈孺人
黃氏附考妣之側謹告

祔顯妣告文

男某不幸吾母棄養于京邸悲愴舟還奉主安于寓
舍小祥既久寒暑忽周禮大事甫畢當祔神主于廟
今草土之餘初有居宅力不能特祠以奉宗先姑為
四龕置四代神主寢室之中庶以遵脩歲事陟降于
庭節惟既安顯考神主當奉母慈神主並歆時享怡
往悲今涕泗交集謹用虔告尚饗

祭姚碧塘文

嗟乎先贈君蓋雅慕公之為人一見而交平生驩約
為昏媾杯酒相過從抵掌而樂豈不期之白首哉癸
酉之歲先贈君遽即世公哭之哀已送之龍隱山中
哭愈哀匪直昏媾其中誠默有合也然先贈君年重
五十有六耳公後先贈君八九年亦重葦六十豈
人世逆旅夢幻泡影有感之而易悲者未若相與相
羊徊翔冥漠之表尤為樂哉又何哭公之遽也公蚤
歲愛子嗣乃後連舉兩子嶷嶷然長矣逆其來有足
以昌公之後成公之志者則年不登於耄耋安在其
不愉快邪執公之締述先贈君與公所為今昔之感

以哭公於素筵公其亦知而歆之

祭李通判母文

惟靈懿淑凝祉發祥儼德厚基昌嗣振芳繁嗣奮興
人稱令子自其髫髻翩翩文士楚闈掄藝霞變雲蒸
時以弱冠橫厲騫騰喧傳一時屬目動色溯源考世
義方攸殖和丸斷織遺則斯存種善而獲乃大于門
肆初令蜀政美德孚聲問翔洽疏薦紛敷遂承帝渥
從爵典隆恩綸下錫冠帔在躬已擢半刺遵塗微郡
潘輿匪遙色養方幸齋捧之役肅將帝京竣事則旋
稱彼壽觥謂慈壽康子念彌萬彩衣照耀介于遐福

數有偶值婺彩不留燕邸營營山計未投郡公孝思
驚仆幾絕泣血南奔彷徨悽切顧惟論孝於其大者
名立親榮自餘為下扶襯以歸江漢之濱丹旌素旆
凍日寒雲雅託年好既唁既慰薦藻脩虔令立於緒
祭張文忠公文

五嶽炳靈列宿降精間氣名世應運代興爰自童卯
穎竒敏博弱冠登朝石渠著作蓄志康乂殫力討尋
法律典章諳習諳明演綸紬書而心當世四方人物
靡匪籍記成均作貳士樂甄陶公望斯崇佇想燮調
穆廟方潛執經勸講遭際龍飛雲從以上既參大政

沉默雍容周旋在列和衷協恭受命憑几擁護冲聖
不動聲色危疑以定士習惰窳吏治譸張弊必搜剔
法必慎詳六款敷陳奉以終始事考其成議求其是
內勤啓沃外謹機宜細大務親毫髮自劑舊學春隆
偉然碩輔上尤倚毗何疑何阻化裁獨斷如柁運舟
不震不撼匪詔匪謀無有遠近在共綱紀伸之縮之
以就吾理蓋首端揆十禩于茲粟朽貫陳順欵逆威
勳績日茂倚眷日隆薦柴贊棄矢志匪躬云何一疾
溘爾仙逝九重之惻惟以盡瘁師垣穹秩創畀于公
贈謚有加上柱文忠贈祿豐緡皆前未有酬德勸功

恩禮孔厚惟公不朽壽於...嗣君接趾玉墀
乘雲騎箕逍遙游衍...如神矣如見某等托契
次君登進同科薦藻酌觴薤露悲歌

祭野翁朱先生文

壬午四月十三日我師陝西左方伯野翁先生卒於
家越明年癸未閏二月四日門人翰林編脩曾某始
克為文致香帛敬弔先生曰祝融石鼓蒸湘洞庭奠
茲奧區鳩宅祥靈匪伊偉人挺節勁操疇發幽秘樹
聲流耀於惟我師含真稟和大節此生嚙乎弗磨爰
自家食素業晏如取嚴一介名恐寸汗孝弟之敦自

其天性於貧若飴於義若競聚徒授書二十餘年跡
躋名起鬱為時賢強仕既逾始收科甲旋以大行擢
置臺察巡鹺淮上凜凜風清廣右論列震撼元臣道
直物忤泉州作伯政成豈弟西山並烈忤者未厭疏
為運司世不勝巧而公任之處穢而潔彌抑而奮歷
浙藩臬咸歸清論薑桂之槩在所而難既騁其轡亦
頓其銜已從河洛左轄關內滄滌弊蠹節縮經費以
端表帥以肅窳窳三秦慕德遍于羣謠勛猷之積公
望攸屬忽焉歸老修途躑躅不用而歸世方悼嗟誰
幾何訃聞天涯悲哉痛乎上壽多有壽我典刑以

淑士友遽奪我師孰範孰模浩浩正氣乘虛入無嗟
乎悲哉不朽者名水深山高鄙寬薄敦節於我師載
德高厚服膺訓誨庶克有就往歸里中適師甫還飲
予餞予音容睫端豈謂離筵即成長別寫悰告哀有
淚如血尚饗

祭陳太宜人文

丹穴渥洼儲靈孕祉其羽五色其足千里匪伊物瑞
人亦有之女德之淑衍慶在茲楚有雋喆馳聲秣苑
典籍胸貯鬱盤萬卷疇克鍾此龍媒鳳雛繫母秉德
作配賢儒洞庭之波雲夢之澤灑氣磅礴於焉攬結

寔生長君嶄然厥初有美篇翰玉珮瓊琚往在戊午
楚士彙進作冠我等蔚有嘉問已擢甲第起草南宮
青雲之司鳴珂雍容五載迄今兩膺褒典煌煌制詞
母德用顯永期壽考祿養未涯彌陟彌崇象服有加
墜景易夕頽波不復凶訃南來悲心刺促長君之痛
顧謂終天有淚如血徹于重泉嗟哉孝思於其大者
顯親之云視含為下椒酒之酌既苾既芬遙遙素衷
叩于杳冥尚饗

奠沈少林文

曩歲丁丑南宮甄士射策帝庭慷慨國是宣城豹奮

獨對萬言汝董汝龜以騰以騫偉矣龍頭翹然鷺序
染翰淋漓屬篇鴻鉅匪伊文士亦閑武韜行間意氣
塞上弓刀負茲倜儻翩翩節俠整步為迂保軀為怯
會有國論藉口經權憤激義形書議其愆言者既罪
志輕一死謝病文園浩然東指自歸敬亭放浪江湖
齊雲九華西湖具區遊踪所至悲歌擊筑興盡而返
何為空谷主恩罔極龍頭謂何結束書劔將還鳳坡
北首有日俟之闕下討論典章揚摧風雅論思講幄
行受眷知計日登筵則有措施胡趨而蹶弗止而泥
二豎俄侵一疾倏斃養生之學談每津津有方不效

於術何憑問道大師亦云許可將從汗漫存此真我
世路方亨靡有荆棘逝者已矣寧不慨惜蘊竒必發
引領方來跬步萬里騏驎乃摧某等同升附於榜末
矧辱高義訃來忉怛骨則可朽名不與祖飄飄塵表
其人有無豐受嗇施詒祉其後二妙並超食報匪謬
新阡穹窿音塵渺茫薤露嗚咽絮酒徬徨

祭少司馬王毅菴公文

惟公挺生儲祥毓瑞榮名偉樹崇勲累勩緬方弱冠
譽振瓠林首舉賓薦目屬瓊琳旋擢上第含香蘭省
人文張楚陽春推郢爰用經術簡自九重日侍先帝

潛邸雍容資既逢世講勸矢勤依附日月遘會風雲
聖主龍興公亦鳳翥歷陟寺卿徊翔近署公寔宏抱
文武兼資出鎮滇南乃竟厥施自公入滇德柔威東
風清遐域化行殊俗勲猷以茂上念厥勞俾貳司馬
入贊戎韜旌旄在里車馬在門璽書是迫佇接來軒
慶者未已胡吊斯及如濟洪濤奪此舟楫訃聞朝堂
縉紳悼嗟恩卹優渥錄蔭有加顧我同里喟公甫強
究所建立何鉅弗當尺幅有定先秋遂零身名並完
既享哀榮羈宦京邸雪涕褰屨絮酒申詞以當紼謳

祭賀松澗翁文

嗟呼悲哉公何遽徂謂公弗壽古稀則逾謂公壽乎
粉榆則吁繫公矯矯人倫楷模流俗逝波訾學詆儒
綦谿利跂鬼瑣紛如而公慕學吸真味腴桃岡宗工
倡道閒居累糧鼓篋亦步亦趨灰子中間厥議弘敷
精心覃思遂掇玄珠小雲谷山龍嵒盤紆詠歸在茲
環堵據梧證道南遊祝融舊墟座上春風遍飲醍醐
亦理舊裝觀光國都及銓州倅棄置若汙公學淵海
公行瑾瑜約會聯社厚俗訂愚德龐化淳道振譽俱
惟天報公龍種鳳雛競握靈蛇飛揚高衢次公之興
前茅長驅文章吏治彬彬上虞公方壽康佇覲洪圖

褒綸方錫奠楹遽符緬懷素風澹泊怡愉掃迹泥滓
健羨既肱虛心實腹皆生之徒豈其觀化欲還太虛
嗟乎悲哉公其歸歟陋巷之琴沂水之雩籬邊之酒
花外之車造化逆旅天地蘧廬孰殤孰彭孰我孰吾
去彼有涯留此有餘遙叩冥漠歆我生芻尚饗

奠封少師張嵎川翁文

惟蒲宅勝黃河之東中條秀野太華遙空嵎源百里
滙茲澗瀆乃鍾明德克開融朗明德伊何矯矯人豪
恭儉恬愉偉行高標孕和韞粹是生元老弼亮今皇
幹旋宏造自頃之治懲惰振偷或病濕東亦傷剔搜

聖治更新相業隆起垂紳正笏釐弊興理霖雨一施
立潤槁枯民和物熙塗懽巷呼載此懿鑠邈厥原本
加額籲祝享壽惟永以紓隆眷以終大猷臻于上治
邦家之庥南極忽殞西山易夕訃來蒲坂朝紳於邑
元老骨立徬徨以哀其若四海翹首泰階公以翁歸
翁以公顯異數優卹崇恩繾綣矧翁祉履當代稱完
煌煌蟒玉森森桂蘭鄉為耆碩國為人瑞優游寰中
昂藏區內福壽兼有生沒並榮乘雲御風徊翔九京
某等習翁于公夙從館閣覲德無因欽風靡託陳詞
酌醴東芻是將庶以告虔鑒于馨香

奠張封君文

齊有殊雋締好同門扶異緼奇遠造孤騫孰濬祥源
麟鳳挺出厥翁壽耆厚德靡匹世澆俗鄙爭巧爲虛
樸茂簡質淳然古初鹿門漢陰林園曠適既鮮機事
亦寡釁戚敦龐凝祉靈瑞毓賢奮角振羽中秘是銓
才名沛艾擢登蘭省優游清秩脩途方騁大慶覃及
褒錫載崇綸章敷賁壽福基隆翁志猷然泊若其素
章服之華曾弗為慕貞此矯節恬澹無營壽之用介
卜以長生比聞北來再視邸第矍鑠方聞期頤弗計
尺幅有定逆旅當歸美哉牛山顧而涕揮天孫奈何

文人推址數固有極彭殤等耳爰潔芳酌集我同袍
奠獻杳冥靈兮逍遙

祭劉純宇文

嗚乎公籍武也而寔儒生乃楚陽王君於公為姊夫
而寔師也其相與切劘薰炙舊矣故其既冠弁胄而
武也猶然儒生也儒生迂不能溺其習以相效也當
事者儒生禮之間稍稍簡用之其若儒生迂何猶然
食貧家徒四壁立俗豈不交口嫺詬之哉然以此不
負於楚陽君之切劘薰炙亦足稱矣其子茂才君為
不佞家壻尤欲以儒生起或將收儒效於他日亦毋

乃食報於迂乎則不佞樂傳述之矣公以盛年遭疾
疾遂不起天之佑公于其子不于其身豈亦所為共
嗟咨悼惜者也而况兒女之感乎丹旒在塗敬以一
酌叩公于杳冥惟公歆格之嗚呼悲哉

祭劉太母文

惟漳有劉並產麟鳳麟既間出鳳亦超衆謂鳳伊誰
翩翩計曹五色霞爛矯首雲霄謂麟伊何發解閩省
擢魁南宮執林脫穎一門瑞集人稱二難方在提孩
悲哉能丸曰惟王母其恩罔極幼而顧復長而教植
及茲成立偕奮迺興王母燕喜隆祉是承蟠桃正熟

靈椿忽殞麟鳳南歸哀哀參損云胡慶門弔者踵臨
泣麟摧頽王母訃聞威鳳羈栖有淚如雨銜恤遵塗
以望漳浦令伯之劉審禮之元亮也如寅典制弗讐
允我同門義關休戚潔此樽罍叩彼冥劫鳳之孤騫
振發羽儀褒錫自天終慰有知

奠李封君文

槐楠楚產明堂是需高原茂林託根則殊鄔郢之陽
有城山澤左公所居代為名邑鉅卿碩彥相望蔚興
派遙仙李有士騫騰祥源長發及翁崛起儲祉葆和
施於令子緬翁高義具在鄉評病乃廢學慷慨平生

母之孀居垂四十載婉容在側潘輿菜絲仲覆儻般
逮捕孔嚴倒囊傾貲以釋于阡鄙夫一錢忍弗予物
翁何內顧惟善之積負茲倜儻瑞應福來五鳳翩翩
中郎偉哉白雲清署優游間適離垢遠氛巋然名德
方期峻陟椿齡未涯祿養崇榮封誥游加南郡訃聞
同袍嗟悼福以川至壽嗇耆耄翁之明達僊然塵寰
遊必客俱情靡俗關其於死生等之來去詎猶猶子
寧不悲慕中郎當還執紼無從雪涕靈筵伸以寸棕
寥寥仙京素輶丹旒恩綸九重奕世永耀

奠李封君文

惟靈雅韻標俗冲懷忘物龐德共隱蒙莊同適樸茂
淳固秉義質仁至性肫藹高誼嶙峋繫厥幼學綜緝
文藝芥拾弗竟產殖能惠偏慈孀節省定頽年百方
以娛敬養無愆友于因心鵲鴿急難卹孤既沒成立
笄冠德在閭里情洽戚姻黽勉有無濟施困貧備茲
休美靈秀乃泄郎君競爽食報俊哲大夫名起上國
所珍命錫自天綸綉如春冠弁莪莪煥爛純繡怡此
景青陽白晝邑有耆碩黨集親交携手林園陶真
道遠大夫使歸里居良久顧視愉懌尋樂尊酒還謂
大夫悠然春容肯以外物而胥吾胥大夫北來念茲

康豫一意公家徘徊粉署何期偶疾遽聞訃音若木
修畧濛汜奔沉某等結好大夫南宮並薦夾轂燕市
時從遊燕愴矣素帷楚天微茫蘋藻匪羞悲心徬徨
祭張母魏太宜人文

荆山之秀蘊玉而暉丹穴九苞威鳳天飛玉質鳳彩
罔卿疇匹溯本考祥有母尹姑繫歸于張婉慝惠溫
圖史靡愆內則斯存相厥夫子克成令嗣和丸斷機
迄于登仕罔卿之起寔維茂齡翩翩楚鄉健翮修翎
射策九重含香蘭署草定新儀頻繁恩遇爰自儀部
翱翔墮司使歸將母潘輿北馳母也榮養子亦崇擢

蟠桃歲熟瑤池方樂封典游加制詞煌煌載此
帝恩霞綯珠光罔卿在側銀艾有粲白雲匪遙色養
以衍謂享壽祉詎測高深婺星忽墮悵結羣心曩緣
鄉書獲訂世好淑德稔聞及茲壽考總帷南返丹旒
搖搖辨香申詞靈兮於昭

祭林母徐太孺人文

七閩真疆世稱鳳林有鳳軒翥鏘鳴

帝廷晴立鳳雛母徐毓靈緊母雛鳳攻苦茹辛初偶
室匡拮据紛紜中集而卑雛失其舅形影相吊廢著
兢兢乃雛戢翼澤厥羽翎五色既具乘時奮升今帝

當陽運昌而明鳳之階矣其聲白聞爰集屬此辭倡
呂賡班聯序綴茲謂已榮雛遂母念母亦雛懂蕭使
于里潘輿駢駢翱翔入都雛怡母欣何以饌母大官
之珍綾殼以御內帑賜金自頃有詔褒典霑恩錫母
冠帔需日以膺母壽無極雛乃大振謂強而康奚啻
百齡云胡遘屯溘先露零萬里就養豈疲於奔旦夕
弗延或數之云捐雛雛踈控于冥冥月沉川逝蘭萎
珠沉雛可如何載魄而閩同群於雛附翼以登聲氣
之合塤篪奏音覩茲素車涕泗曷禁爰奠椒漿以瀉
衷心

奠吳南臺母柯太孺人文

噫嘻太母昊天不吊凶訃南來九江流涸九華峰頽
 板輿弗御遄即夜臺哲嗣扶服風木含哀噫嘻傷哉
 秀毓名門德成質性姆訓是迪婦儀克敬曰嬪贈公
 黽勉家政富而好施媿美叶慶篤生賢子竇桂荀龍
 徙舍同劬和丸比蹤夕郎起家竟亢厥宗亦有諸孫
 玉立雲從惟此夕郎端委佩玉振譽青瑣為世拭目
 名德迥然聯翩奏牘峻秩方登恩綸賁軸翟第象服
 有燁其光含胎弄孫介壽無疆音書襲沓示於帝邦
 汝無我念敬恭朝常云胡疾遘變生倏忽請急倉皇

旦夕舟發適謂仙遊沈沈之遺悲鳴初宰
 噫嘻傷哉某等幸借公子之靈於今幸請苦席
 南奔同心博得真即身魂遙將况其茲美哉

奠張師母王夫人文

爰有女德儷美名世儲祥葆靈擢秀叢桂茲惟純祐
 天縱慶門灑氣鍾滙垂于後昆嗟我師母稟精彩婺
 動合圖史言成矩矱窈窕孔淑鳳卜應期天立厥配
 相業是基相君奮興校讐石室講幄進規盟心造膝
 入參密勿秉軸持衡改革滌除倏為泰清化日初熙
 甘霖載潤悲往不來川駛一瞬物理有極弗壽厥躬

安貞恒吉坤載何窮緬我師母齡未踰六胤襲祚臻
樂竟歡續諸雋在側色養無違兩君聯翩華貫仙闈
綸翟緋玉既宅隆祉含飴以嬉介壽方始云胡哀訊
一夕自西玉女峰墮王母宴催訃聞九重恩卹加等
備物榮光熠燿有永某等相君選士辱與明揚教植
弘施載德彌長師母猶母寔切瞻慕愴怳素筵啟詞
傾悽

奠益陽賀母文

嗟惟女淑閨閤幽貞儷德匹賢有終無成泯然非儀
婦順既明衆稱其賢而熟與京乃如太母寔邁倫類

維德之行通理圓智綜經

克造厥德

綴飭燾庇在祿慶裕謂稔嘉貧執勞去奢

政總外內事集紛拏襄贊贈君登涉道涯盲姑在堂

無方就養亦脩中饋賓朋酣暢親志弗違以隨於唱

猶厚厥終于其喪塋尚平願畢業復蔚興贈君鵠舉

陋彼鞞鷹五柳之陶無為斗升真樂自足伊誰之能

積厚留餘貽穀燕翼學海淵源熊九警飭篝燈熒熒

宵分罔息聿觀厥成翩然上國金昆玉季競爽爭妍

金相玉質特達絕肩乃魁南宮乃峻北聯冠帔有輝

爛然瑤篇上谷使歸潘輿方適摘筭林隈采蘭溪澤

班瀾娛嬉稱觴仙液延祥介禧上壽方迫數固有極
日夕而西壽考令終母子其依何有不慰瞑目浩歸
孰緹之合曾不後期節等誼屬通家徵德考世訃聞
咨咨悼往嘆逝緋謳莫續愧托未契絮酒迢遙躑躅
凌厲尚饗

祭王太師母文

天毓名世女士配坤辟彼河潤發自崑崙倚太夫人
大邦孕秀玉瑩蘭芳徽音駿茂乃及封翁恤匱殖信
計腆如約慶榮若涼居恒誦佛夙明真諦彼岸先登
福田無際義方伉儷雙鳳蜚英我師相業瀕視阿衡

君親繫念再起再辭高堂鶴髮喜懼在茲母曰汝往
勿虛上意詎以我故而後王事勉承赴闕魚水交歡
褒恩殊數洊被和丸正色立朝攄此忠赤羽翼既成
師還孔亟帝曰卿留誰倚誰毗疏至十三奉歸母氏
日奉觴祝桃實三千潘輿瑤圃舞袖翩跹六根塵淨
婺星忽黯霜雪淒其訃聞哀慘嗚呼昔日燕邸候母
起居此日南國痛母踟躕有賁綸音幽光曷既可盡
者年榮哀弗替某等叨師教庇立雪門墻師恩靡極
母德難忘絮酒潔虔几筵莫即烟水渺然瞻慕哽咽
嗚呼哀哉尚饗

祭岳母貞節劉母胡孺人文

痛哉悲乎歲戊子母之就視余室于郡中也病幾殆矣母虞其客也恐見累節慰之曰母即吾母有如不諱而含歛于此國顧之何客之念為踰旬而病良已歸踰歲節携家室還

闕下道經衡山下獲與母別母之牽裾涕漣於余室之辭也異於曩昔蓋若永訣焉痛哉悲乎母時六十耳仕宦之日幾何豈其相見之無期心脉脉動若謂離之必不合也壽果止是去別之年董董五寒暑及今而想像音容於其在家也已若夢寐中人幸不

即捐棄於在郡之病而終不能久延於遂初之後以與執紼之役也此不亦天若有斬之者哉母之稱未亡人於龍江公逝也在孀居者三十餘年貞節之操孝睦之行慈愛之懿內外無間言終始無二致固女德之楷式已天奚不畀之多筭且母使節與余室有不再見之悲也乃奪母速乎塋不及臨坎祭不及臨几有淚如雨越數千里悲乎痛哉尚饗

祭劉封君文

惟翁積仁蓄德抱樸含真醇古之範冲夷之襟世稱長者躬禔完行天錫祐祉胤祚昌盛二難並挺五雲

聯翮金昆玉季仲篔伯墳伯也龍驤平反訊讞譽高
棘寺時名稱豔伯氏鳳騫非蟲聲秘書迨署司馬石畫
中樞

帝眷特隆抗旌楚臬祗奉 璽書握兵南徼威惠宣
鬯髦釋謳吟羨翁有子祿壽天申

恩綸疊煥寵莫與加霓裳綵賁為國華玉樹蘭莖
森森隆茂宜膺多福以介眉壽胡然寢疾遽爾遐賓
珠沈玉泐星殞日傾翁雖享年僅餘六袞翁之食報
未艾方熾豈或遁跡疑亦上仙訃音南至仲遂東旋
士庶咨嗟酸楚躃踊微庇末涯攀慕曳踵某等曩與

仲氏聯轡承明幸蒞境內宇庇棠陰沾沐教澤溯源
於翁悲聞薤露哀痛激衷敬馳香帛遙奠杳冥伏冀
精爽洞鑒微忱嗚呼傷哉尚饗

奠王心齋先生文

學有正緒肇開唐虞晦明明晦義存詩書爰及孔氏
天縱弗試不厭不倦立則萬世六經刪述孟氏紹明
濂溪以來豈曰無人繫獨先生崛興淮海魂靈自悟
幽通玄解大義數十遺教炳然知者世稀正學賴傳
節生晚質愚猶幸私淑垂三十年醒以餘鐸來遊南
國密邇宮墻啓予翼予歆此潔芳尚饗

奠程天津翁文

憶歲乙丑不量自學無所稟承輟於既作時維七月
石鼓見公數語醒然朝夕幸同凡有談議理必求妥
公無漫言予無苟可首明大學傳來東淘字字以疑
切磋商勞先後七年一別長逝成我者誰詎忘其自
頃來南國切近賢廬祇薦馨香神明相予尚饗

紫園草卷十一終

紫園草卷十二

雜文

書益我疆職方冊

衡郡曾朝節著

孔子發憤忘食天下無有急於此學也樂以忘憂天
下無有加於此樂也若只持守一心未可語孔子之
發憤知有憂在亦未是孔子之忘憂蓋孔子於道理
當理會者一一研磨惟恐不得想見發憤乃是實語
與天地合德與日月合明與四時合序與鬼神合吉
凶此心無復可憂矣故曰忘憂也終身此學此樂不

知老之將至其地位良不易至哉吾人學孔子者也
此心未悟發憤以求悟豁然悟矣默而識之尚須好
古敏求學而不厭道理儘無窮也樂者由學有之所
謂見大心泰心泰無不足有此樂體到渣滓融化性
天澄定然後能與憂忘也比節過別我疆丈獲聞諸
公論及孔子斯旨因綴鄙見於冊以識別亦因以求
正諸公焉我疆丈歸而相證其於此各何如也

萬玉山房間

傳野張公愛竹山房有竹萬箇頭曰萬玉余疑公之
愛竹非無取也疏其意問之大江以南多竹惟壯苦

寒絕少即有之視江南竹異乃愈珍惜焉公居江陵
不難有竹亦不難竹至萬何以玉視竹豈易得者顧
反貴歟人情貴賤無常白珩貴也楚語乃曰楚國無
以為寶今種竹之多愛比於玉是為白珩者萬也豈
孰大于是古人有愛竹者取其能醫俗耳不足以窺
竹之全夫萬玉備矣或者公之愛以此也竹之始種
也深土而壅之汲甘而溉之周樊而謹護之如此其
不可輟也君子植德其身培厚之以基滋息之以時
兢兢乎恐其戕之者自外也何以異於種竹乎吾見

公之凝然定也闇然脩也惕然祗翼也蓋取諸種竹將所謂觸目警心者非邪夫竹之生不遽萬吾盡吾力種之矣及春而萌生之多積歲則至於為林故能萬也杜陵曰惡竹應須斬萬竿然則初非任其猥繁耳芟洗其惡而後嘉美林列是以君子觀於竹得漸之義焉擇之術焉允公取義於竹或不止此而此其大也次第問之庶幾有以開我

策問三條

問氣運有盛衰而風俗物產因之方今民尚淫侈士競險詖風俗固日澆也所在生理蕭條戶口減少物

產固日耗也有識者蓋憂之矣當世道之責宜何以挽回之歟儒者操中和位育之說乃曰充拓得去則天地變化草木蕃其於今日果迂論歟夫申飭典制嚴示約束此以捄風俗之壞也滌除煩苛生養休息此以濟物產之窮也圖治者急之矣即儒者高談性命而匡時之術應變之理豈能廢此哉於以挽回氣運抑猶未也則儒者之說固誠化理之源有不可不講歟氣運者國運之所關也比者星變地震之屢聞水荒旱傷之繼奏虜寇兵變無一不厓廟堂之憂勞也拯溺捄焚斯以勤拳矣默宰化源躋

斯世於升平令風俗物產追復國初之盛以綿國運
於無疆此必

聖君賢相日共兢兢於密勿之上者諸士盍相與精
言之主司願有聞也

問建學首重彛倫此本之唐虞育才化民不能外焉
我

太祖 列聖加意太學莊誦

勅諭可睹已規條之頒至嚴至備必令諸生先誦習
之蓋皆為彛倫訓也其視唐虞不今古同符歟三代
之制寢詳姑不遑論太學所崇事則孔子矣其教人

見于遺言非一總之兩端曰博文約禮教至此無遺
法也放勳之詞似稍簡畧豈民可使由不可使知不
若師弟平居授受尤精密歟又何以能使之自得也
今士知從事博約罕矣其甚也決裂章句詭誕於文
詞士習日陋方且郵視太學孰專志以就科條誠懼
無以迪彛倫矧明道成德邪夫學者士所自學也即
無倡之者不可但已况有

祖宗之訓諭在乎盍列其志著于篇

問京營之兵非止衛京師已且以備調遣也乃今日
籍有其名耳倭患且亟虞不能於京師有警驅之而

戰則東南椎骨敲髓漕粟而至給之恐後何為哉豈
終不可詰問歟蔣練無法日在營而為常操不無賞
給終與予市人同必何道乃可使之能戰歟京師空
虛無備矣而今日遣經畧遣寺臣惟遼陽邊海之為
備然海口險要誠不可無備一旦寇至散掠各郡縣
大兵不及今遣其患可勝言哉或舍此當更有石書
也諸生日擊時事必常有槩於中願相與商確其便
亦當事者所願採聽也

讀楚空傳

耿楚侗公與李卓吾公不合十餘年既合而卓吾乃

作楚空傳叙其始之所以不合今之所以合也以志
喜諸以講學遊於兩公之間者莫不喜且以喜報司
空周友山公而友山公喜更甚也即以傳付剞劂而
余獲讀焉余不覺聽然笑曰異哉卓吾之論夫未發
之中人倫之至二語一貫也有未發之中乃可以為
人倫之至人倫之至便是發而中節之和豈可岐而
二哉傳乃謂始卓吾守定未發之中楚侗守定人倫
之至兩相守則兩相病也今卓吾舍去未發之中楚
侗亦舍去人倫之至兩相舍則兩相從也楚侗之於
卓吾果且若是乎哉意楚侗公之初有憾於卓吾也

誠見其捐棄妻子祝髮而為禪僧以倡於平昔所相從士友之間士友翕然從之既以散亂其學徒而不能收拾矣故稱人倫以律卓吾之失卓吾之不能自返於人倫也度亦無辭以自解是以至于十餘年而不合惟夫卓吾之於禪也則真禪矣吾固不知其所得於禪者何如然既已捐棄妻子矣祝髮而為禪僧矣視世之學禪者固真也語曰真丹活人真病藥人卓吾有真病矣安得而不深人乎楚侗公之終與合也意其為所染歟是以漸漬之久忘乎其所守而與之化也甚哉學之不可不講也講之不可不明也吾

學明矣苟其有可節取吾取之何至十餘年而不合苟其本無可取吾終弗取之亦何必十餘年而又合卓吾之言曰人倫之至即未發之中此語似之而非也未發為中已發為和不可謂和為中也孔子曰中庸其至矣乎此合中和而言之者也卓吾知有所謂中不知有所謂和故不知有所謂人倫則亦豈知孔子之所謂中哉能中和又豈至不愛其髮膚捐棄其父母妻子而為僧哉彼其見之偏於內也亦遂謂儒者之言中當亦止此世之講學者第不至於祝髮出家而為僧也而其學大率皆禪不見卓吾之為非

而心是之即知其非而其學亦無以異反自以不及則亦惡能以其不祝髮不去家而傲卓吾於人倫哉人以其真禪而化假禪我以其假禪而心折於真禪亦其理之必然也甚哉學之不可不講也講之不可不明也問何以明曰孔子之學明則道明矣則不至化於禪矣

張節婦真容贊

婦之德一醮天永畢偶影而隻矢念於殘息疇奪我力婦之德從藐孤閔凶汝惟亢宗贍給於紉縫脫害暴克一旦從兮志弗渝完芳節兮未亡軀壽乃歸兮

閭里吁

演連珠二首

蓋聞物需乎時雖有榮華不以艷於速化性貞乎秉雖有凋瘁不以移其素操故春陽未燠桃李不先早梅競花寒威已嚴松柏猶後衆芳孤秀

蓋聞人之所貴不因其賤而失所貴於人已之所重不因其輕而喪所重於己故卞和之玉不貴於王縱三刑而不辭隋侯之珠何輕於鵲曾一彈之不可

奉

旨撰硯銘

不澤何以濡乃為之谷故其德虛不平何以施乃為
之砥故其用宜不谷之儲而澤何以餘不砥之貞而
用何以永寧

不用而動或挈之也不動而用莫掣之也茲道之存
動靜惟時也

竅其實混沌闢淵泉時出訓言永式

磨而不磷乎學日益矣涅而不緇乎道乃白矣

應制詞曲

萬年歡二

日

縹緲長空見扶桑晴旭一輪紅日彩散明霞灼灼晶
熒炫赫照徹九州萬國疑瑞靄龍樓鳳闕縱秋風零
露能晞臘底暖生冰雪 葵心正切喜太陽浴海經
天騰驤義轍金鏡高懸物怪那藏毫髮人在長安更
別舉目見羣心胥悅况恰是柳綠花明春色融和時
節

月

杳靄層霄見銀河清淺一輪華月練淨深林湛湛冰
盤皎潔直透幽扃暗室恍風景瑤臺銀闕縱炎時青
簾添涼寒裏白增霜雪 蟾宮正寂喜碧天陰翳全

收素娥清絕金掌輕籠玉液光中凝結浪說蓬瀛更
別三五團圓無缺又早是藥就香飄秋色平分時節
應天長四

風

漏傳玉滴墀動翠旂虞絃正調新曲披拂飄颻莫測
端倪在林木煙光裊雲影亂遍四海化工神速捲氛
翳滌蕩乾坤都歸和淑五日登祥籙那復鳴條窮
巷撤茅屋彷彿古初清穆寰區被芳馥陋豐沛思德
士拓霸業竟成卑蠲羨今日虎嘯明時泠泠生谷

雲

五花彩簇三素影含休徵總呈丹殿竒狀殊形變化
氤氲紛絢爛籠鳩鵲流太液瞻鳳闕宛然仙苑驗祥
經太史頻書詩歌應遍萬國齊稱頌欣覩從龍輪
困起霄漢嘆惜楚王何自陽臺夢妖艷羨仁傑望親
舍亘百禩汗青垂勸對今日往迹悠悠江山迷漫

雪

鶴迷島嶼鷺失水涯都城共看三白搖曳寒威一任
續紛入空隙填深谷平仄逕滿世界盡鋪瓊屑儼宮
殿壁玉裝成瑤臺相接景色真堪悅帝軫問閭黃
竹詠方發何處茅廬僵卧袁安正蕭索想關塞愁墮

拍望朔漢寸腸如折喜今日挾纊春生皇仁濡徹

霜

樹丹墮葉關叫去鴻誰家更凄砧杵裝點深秋遠遠
鐘聲度清楚棲鳥啼明月落碧漢外徧來青女抹鴛
瓦素粉蕭森偏撩情緒 獨夜看無語底事天工商
氣薄林莽混濛劍鋒倚處光芒厲威武靖狐塞徙毳
幕凜肅殺謐寧區宇看今日冷浸遙空逕迷橫渚

千秋歲四

春

隴梅開後御柳黃猶逗寒影去韶光驟枝枝含紫玉

樹樹霏紅繡美不盡東風忽送花香透 鳳吹筵前
奏鶯韻稍頭又升晴榭迴芳岫長楊連寶砌太液疏
珠溜喜芳筵青皇欲為君王壽

夏

麥秋長晝到處槐陰覆梅雨過蘋風驟荷花香御榻
竹影清宮漏看不盡石榴紅綻青蒲簇 一曲南薰
奏芍藥堦方茂軒檻外樓臺後竒峰羅翠幄淨沼含
霞繡喜燕閒冰盤欲為君王壽

秋

嶺容初瘦黯淡涼飈透 垂柳變圓荷舊危巢雲戶穩

暖藻銀塘也應念伊人宛在蕙葭秋色蒼蒼

齊天樂四

孝

人生百行惟先孝真心但看年少乳哺方離鬢髮未
落繞膝依依歡笑韶年轉盼漸雙白交垂景當殘照
滄髓須供旨甘柔滑親心樂 菜子衣黃香扇也應
知罔極寸心難報漫數前賢曾參閔損萬古芳名垂
耀虞廷帝舜止共說重華事功難到只恁終身慕親
天下少

弟

三荆樹榮枯每聞分聚林
西鳥無悲弟恭兄友常如素 豈同居屬共被看當
一歲行至今增慕暗想連枝潛思一體有使至情平
倡予和汝便覺有怡怡自然真趣若到心和氣和
忘蹈舞

忠

恒情物我分胡越誰能盡傾肝膈緩急相謀尋常有
托情誼終難遺忽藩籬剖破更休論親疎那岐家國
殫慮攄忱視人如已矢天日 懷真心處世上倘逢

時遇主尤須激烈勉竭涓塵期禪海嶽敢顧微軀毫
髮孤衷耿耿也不負皇家聖君賢弼待得丹青萬年
傳偉績

信

人心渾渾森羣有於中細看樞紐未發言前方臨事
際虧信還應能否真醇內蘊果屋漏非欺中孚無咎
感格神明貫通金石道恒久 情虛浮理謬妄縱開
心待物總宜緘口鷄黍相期虞人有約往哲當時寧
後揮戈轉景也只此精誠九霄如叩肯使千金一言
為敝帚

永遇樂四

仁

耳目無交心思方寂生理原足入井陘危牽牛轂鯨
不覺真機觸能充此念火燃泉達四海盡歸容畜想
唐虞巍巍蕩蕩未應外於仁育 欣逢帝世齊瞻仁
主黔首歌聲相續解網如湯下車似禹念徹逃亡屋
天工造物春陽施化何異帝仁同沐共看取九重雨
露萬山草木

義

萬事絲棼群方岐列裁制須果尺寸分明權衡有定

物理如觀火肯因姑息優游遷就遂任事功頽墜縱
滿江波掀浪湧自應只憑舟柁 皇心玉粟宸謀淵
靜寧虞機務煩夥總攬權綱較量失得半點無偏頗
當前臨事發強剛毅不遣聖謨微左共看取一時義
舉千秋譽播

禮

約束筋骸綱維容體原有天則纖悉相離斯須不敬
暴慢應隨入端莊儼恪康衢屋漏到處寸心無斃自
一身周旋委曲莫非三千三百 事天享帝動民臨
衆此際尤宜寅飭聖慮清明睿情安定身度聲為律

慈闈孝養郊廟洋洋至禮不緣容飾共看取一人建
中萬方畫式

智

月色宵澄淨心波淨涵照空碧靈境無塵真源不雜
炯炯同明徹幾微勘破物情人品蒼素較然分別此
須多潛藏隱伏馬能略逃毫髮 知來藏往博今通
古萬理都歸全哲快觀明王先登道岸不假思惟得
光懸睿鑒靜揮仙藻上智本來超軼共看取忠賢簡
任典謨耀日

慶春澤四

琴

流水聲幽高山韻遠鍾期千古知音嶧嶺孫枝衡山
嘉樹千尋誰將直幹良工斲映七絃軫玉徽金聽冷
泠角徵宮商鶴唳鸞鳴 吾皇此日從容地操南薰
為樂愜解斯民秣馬神搖遊魚大液還聽移絃易調
翻竒弄更盤桓抑按悽清又何誇善鼓桓譚長嘯孫
登

書

河馬呈圖洛龜示象初開千古斯文道脉遙傳微言
漸備遺經還多傳注充梁棟更百家襲玉函金看盈

車錦帙牙籤日耀星明 珍竒不入皇心玩日神交
上世經史娛情虞夏商周從來遺緒探尋都將義理
歸曾次更興衰得失分明又何誇乙夜文皇閱市王
生

畫

設色通靈傳神絕技丹青妙得天機壁馬鳴霄殿龍
噴霧稱竒正經三史分羣品藏名筆祕府爭輝更誰
描石上青松應手生枝 九重清玩熙和日任左圖
右史寶繪愉怡仙境名區卧遊坐上依稀麒麟已貌
功臣像有真龍死在堦墀只恁教王會圖成化洽華

夷

碁

象取方圓機存動靜曾聞柯爛仙枰運計乘虛分曹
並進經營盤中律呂聲遙應忘憂處兵法堪論正相
持對壘交鋒制敵推軍 皇王雅意分陰惜悟馳心
鴻鵠未若專精垂戒猶賢須知治理中存舉碁不定
貽餘釁識玄機先後分明只恁教一着成功天下昇
平

清平樂四

筆

中山秋兔被褐惟蒼素一自蒙恬深結束彤管光華
堪妬 提携幸厠璇臺青煙紫霧徘徊讚述帝王勲
德何辭毛髮摧顏

墨

池端波湧簇簇雲煙重恠底春窓神忽竦詰屈龍蛇
光動 松滋後裔流傳嘗蒙上台宮前陛下欲知名
姓小臣絳縣陳玄

硯

玄玄冲性毛穎同親近利鈍從來殊動靜論壽終應
難並 堅貞自守庸庸青松池畔煙濃詞源倒流三

峽無慚即墨分封

劍

龍泉精吼魑魅中宵走炯炯赤光侵北斗欲倚崆峒
山首 琉璃寶匣瑰奇金環錯鏤陸離幸遇恬嬉盛
際邊疆何處塵飛

奉

旨撰對聯

年節

首祚開三朔

韶光麗五雲

彩霞長樂曉

新柳建章春

燕喜蓬壺邃

鶯和日月高

芳椒迎曉日

仙萸報初年

玉漏凝禧永

金鋪奏瑞多

帝德九重凝宥密

皇圖千載會貞元

仙掌光懸元會日

天顏喜動未央春

彤闈瑞薦宜男草

紫極春浮獻壽盃

春轉紫微風乍暖

日高丹禁晝初長

玉漏方稀一朵紅雲常捧日

銅池欲暖九莖朱草忽生春

瑞氣九龍盤鬱煖入霞杯

祥雲五鳳光華春歸斗極

昌期臨淑景 祕殿啓新元

五色雲深處 三元日暖初

初莢開丹地 寒香度綺疏

宜春風細細 宣政日熙熙

泰運催芳節 祥雲護豫游

曉日金華籠綺麗 清時玉輦駐芳蕤

冕旒日暇齋居地 丞弼春和名對時

月令陽和開紫幄 春風晝暖動青旗

深嚴羽衛天門遠 燦爛雲霞日御閒

雲晴日麗初元景

柳綻梅香祕殿春

散宸從容講幄春霑魚藻宴

彤廷豫泰詞臣日和柏梁詩

天闢帝王居四望山河擁秀

春融城闕地九重日月增華

午節

地臘開新節 天庥迓令辰

午位天居泰 明時帝曆長

縷繫五絲增聖筭 蒲開九節動仙杯

一塵午風仙賞洽 九天陽德日輪高

仙樂九成共睹龍顏歡寶幄

靈絲五彩更將鶴筭獻瑤池

御柳金扉綠 仙蒲玉砌青

艾香丹禁外 槐影翠華邊

金鋪端節麗 繡幄午風清

白晝虞廷靜 朱明漢闕新

午日懸勤政 晴霞擁集英

蘭池水暖乘時令 桂殿風清進典謨

迓福喜收楊子鏡 頒恩催賜殿臣衣

晴翻赤羽通明午 陰轉青蒲太液涼

晴殿晷長仙仗肅 風櫺涼細御烟濃

殿閣陰陰柳密槐濃朱輦度

池臺隱隱蟬鳴鶯轉翠華臨

朱櫻低綴禁林中頻開雉扇

翠荇平鋪仙沼上時薦冰盤

通用

嚮離延景祐 保泰協貞符

鴻圖天地久 駿業典謨新

宇宙歸皇極 山河拱帝圖

九天看鳳舞 四海慶龍飛

風雲宸殿合

星斗泰階平

金爐烟篆浮龍陛

玉珮聲和滿鳳墀

五福自天皇建極

一人有道世昇平

庶物咸熙皆帝業

匹夫得所是天心

九重日月蓬萊上

五色雲霞錦繡中

東皇臨上日

北斗轉芳春

曉日明畿甸

春風藹禁城

江山春暖日

梅柳雪晴時

佳節春風度

清時化日舒

麗日遲芳節

和風早上林

海宇雍熙世

都城爛熳春

彩霞初曙海

黃鳥漸鳴春

煖風城闕皆春意

晴日都門總物華

令節風光看柳色

初年春事在梅花

雪融禁闕春初入

日上雲霄氣正和

三春節候繁華裏

四望江山壯麗中

造化似言羣鳥轉

春工如繡百花明

草色日和芳野逕

梅香風細度簾櫳

化工無迹秀芳草

春鳥有情啼綠楊

生態欲舒百草漸鋪初暖地

好春無限羣花都放向晴時

供奉依黃屋

忠良答紫宸

道泰圖書顯

時清翰墨香

紫闥雲霄迥

彤幃雨露深

葵藿一心惟向日

松筠四序自長春

煙霞寂歷心情遠

冰雪嚴凝節槩清

湛露自濃承露葉

太陽偏照向陽心

陽氣入踈梅始知天意

芳心看寸草欲報春暉

滿地綠槐陰塵埃不到

一庭青草色生意常多

長日一簾清花柳深深庭院

遠山千嶂出烟霞隱隱樓臺

聖母萬壽聖節

婺星輝象緯

慈極輦坤維

夢月逢祥日

瞻天現壽星

婺華雙闕曉

壽域九天開

海宇歡心合

華封善頌來

玉輅迎青鳥

瑤池薦紫霞

仙島喜浮千日酒

慈闈春滿萬年枝

皇家歲啓蟠桃燕

御苑春濃寶樹花

彩鸞青鳥蓬瀛度

淑景香風禁籞長

南極一星迎寶婺

東朝萬歲慶瑤池

仙李慶源千葉遠

蟠桃歡宴萬年同

九重慶日開仙宴

億載長春祝聖慈

神人六膳供慈極

帝女三漿佐壽杯

西王母赴瑤池宴

南極星揚寶婺輝

絳節星輝朱草紫芝承鳳輦

瓊筵日麗祥嵐瑞靄襲龍衣

皇上萬壽聖節

龍御延禧日

虹流毓聖期

帝紀膺全數

天庥集令辰

祥圖凝北極

壽頌擁南山

震夙臨熙運

乾元總瑞徵

九垓歸帝統

萬壽迓天申

帝曆乾坤永

皇圖日月新

弘化裁乾斷

昌辰協泰符

保定鴻禧固

尊安駿命昌

氣肅金天南斗燦

風清玉宇北辰尊

祥儲貫月貞符協

福介承乾景命昌

帝御丕基天廣大

皇揆初度日清華

闔闔盛容仙仗外

蓬萊佳氣御筵中

仙樂九成威鳳舞

卿雲五色褭龍浮

龍德日升光撫御

鴻禧川至永昇平

寶籙錫靈祥常調玉燭

瑤圖啓昌運誕撫璣衡

聖人歛時五福一曰壽

天子寵於四方萬斯年

上玄昭景貺福歛箕疇

至道得長生壽符軒策

一德暢洪猷天保孔固

萬年隆丕業帝命不違

盛德在秋正萬寶告成之候

明王得歲當九天介壽之辰

獻壽蓬壺香藝芝蘭飄鳳藻

張筵桂闕花迎袞冕煥龍章

在直應制

靜裡收心涵養吾之德性 閒中論道恢張

帝之勲華

開觀圖史知邪正 妙契詩書識帝王

端午走驃騎划龍船

六馬飛金鑄 雙龍躍木蘭

錦標明太液 組練映勾陳

龍舟銀漢上 天馬玉街中

奪標來御輦 破的動仙葩

沼艦爭先緣問俗 宮庭鬪捷欲誇胡

御景亭

玉岫迥連三島靜

銅池平挹九華深

鰲峰秀擁三雲殿

虹渚祥生百子池

崑圃闢清虛翛然林谷

液池涵綠淨渺矣蕪葭

浮碧亭

平地仰開青玉鏡

迸空全映碧玻璃

流疏遠澗銀潢麗

影浸高空玉宇寒

小雨欲過涓涓增水面

微風不動湛湛見天心

上善比靈源一泓清淨

真心同止水萬象森羅

秋水虛涵悟物理一原之妙

晴空俯映識地天交泰之機

清景月中碧落倒看星象近

御杯天上清光搖挹水雲齊

澄瑞亭

全收霧氣開明鏡

滿貯霞光擁瑞圖

蓬壺島嶼遊仙地

河洛龜龍瑞聖年

綠水匝金堤靜看生物

滄池來玉輦持用洗心

織錦俯明河淨鋪白練

濯龍疏太液深護彤雲

秀遶宮池佳氣自多清暇日

祥開禁籞甘泉欲報太平年

沆瀣漾金膏盡寫天文池上
清泠開玉鑑都移山色水中

上元

上瑞凝芳節

元春啓麗宵

得歲紀堯曆

張燈奏舜韶

百枝分月彩

五夜逗春晴

執契承三統

含光動九成

春光雙闕麗

夜曙萬方明

天上貞符合

乾元泰道亨

三光迴禁闕

九有奉王春

碧宵傳鳳吹

紅旭滿龍樓

夜色星暉燦

晴光月影高

玉燭調元永

金莖獻壽新

淑氣開黃道

良宵擁赤光

漏聲臨白玉

燈影麗中霄

仙樂陽春沸

皇輿御氣和

帝圖環海岳

天宇繫星辰

碧霄仙掌出

丹禁燭龍輝

淑景熙元夜

靈祥錫禁宸

九重黃道開金鑰

一朵紅雲捧玉皇

懸象著明同日月 向離出震照乾坤
舜樂五絃風欲暖 堯天三祝月初圓
遍曙寶光連太液 重暉乾象藹宜春
春排鳳闕迎仙馭 雲擁鰲山入壽杯
祈靈太乙春方至 宴喜初元夜未央
九華靈燭迴天象 萬寓祥光遶帝居
長樂介禧三正統 建章含瑞九光燈
天門閃鑠黃金榜 月殿晶瑩白玉壺
孔雀扇分何太喜 袞龍衣動盡含輝
桂宮迥上宜春苑 火樹還同不夜城

銅池月滿增祥熒 玉苑春生擁瑞華
靈臺月下朝元曲 仙仗天邊獻壽杯
九微絳蠟爭春艷 萬顆明珠對月圓
春宵玉宇呈花萼 晴漏金壺和管絃
夜色通明春的歷 天心常正世昇平
天臨玉几當元夜 月映金鋪在廣寒
爭輝珠斗天街邃 欲上玉盤春夜明
月高紫閣芳塵淨 春滿彤闈瑞氣濃
一統河山春蕩蕩 太清宮殿月沉沉
宜春仙藻動玉作芙蓉 長樂御筵開星懸雲漢

雲沉萬宇曙鰲駕丹壺

春蚤百枝然花飛碧落

珠閣延晴景歲紀物華

金莖直晚空春邀宸翰

紫府初筵列喜換青春

彤庭廣樂張看升白月

萬斛金蓮子太液春遊

一道玉虹橋廣陵仙賞

珠閣幻竒觀神燈佛火

玉京聆妙曲霓裳羽衣

春滿萬年枝花開寶樹

祥生百子殿月暈銀潢

月色映天杯異香浮動

銀花紛火樹御苑光輝

金鋪麗紫宸月華天淨

玉漏飄青鑠夜色春多

天樂奏臨光月為歲始

聖恩傳放夜春與民同

肅肅建章開四方星拱

巍巍宸極正萬國春同

春看沆瀣生月明金掌

樂報簫韶發天散玉華

儀星別構天珠璣錯落

肖花饒作樹紅紫芬菲

三五月華瑞雪欲邀宸輦度

萬千燈影祥輝志異市衢看

夜色揚輝燦燦六台懸合璧

陽精煥彩惹惹雙門帶非煙

舜樂春風乍暖時鳳儀獸舞

堯樽月色初圓地煙淨香濃

節奉三元鳩鵲觀連清漢合

歡同萬國鳳凰宮並廣寒開

紫園草卷五
雙闕祥煙縹緲淺籠春夜色
千門皎月熹微遙趁燭枝光
春融太液五雲鳳輦度星橋
月掛觚稜六極鰲峰催綺宴
桂宮月向御堦明塵清天路
火樹花迎宸翰發筆挾春工
漸上玉輪紫府正宜排內宴
高燒銀燭赤心渾欲獻東皇
紫鳳仙笙吹落香車塵擁地
蒼龍法駕遊過雲漢玉清宮

陽西仙苑晶光縹緲月如銀
星綴晴空彩色參差春似海

中秋

月光看正滿 秋色較平分
清光浮露葉 素魄瑩天泉
十分瑤漢影 一半桂輪秋
踈雲篩滿魄 滴露濕流光
涼霄天杳靄 禁苑月圓明
天地均寒暑 君王謹量衡
樂律調南呂 豐年慰壯宸

涼氣歸玄鳥

秋光澹紫宮

光滿無他日

明同只去秋

迥漢懸金鏡

涼風度綺錢

月借陽光盡

秋分氣朔勻

露下涓涓淨

秋中漾漾光

月華東海出

鴈信上林來

丹臺今夜兔

紫禁急寒蟬

秋敞清虛府

風淒燦爛天

夜看三五麗

農慶十千豐

兔影全呈月

鴻聲遠度雲

晁體元同日

晶熒更占秋

湛湛天逾淨

盈盈水不流

鴈飛違寒嶂

蟬噪警風枝

南斗待將金鏡出

西風吹徹玉蟾明

明宵應覺一分少

此夜從來千古明

練明天地驚潛魅

珠墮江湖醒卧螭

坐按紫雲傳玉笛

回看素練度銀橋

陰陽此日割昏曉

天地中宵合渺茫

鴻鴈幾聲邊塞晚

梧桐一葉輓轡寒

涼月漸看幾望好

清光獨在仲秋中

望夜總知明徹曉

良宵翻覺景宜秋

赫赫大明雙壁映

熒熒清影百川分

秋聲冷透金波迥

夜色光搖素練長

虛暈入池波影淨

滿輪當苑桂香來

滴曉露珠縈玉鳥

衝寒鴈陣貼星河

樓倚碧天銀色界

樹含清露玉輪秋

商飈朔塞來鴻急

爽氣神州澹月輝

淒清晚景臨丹地

踈索寒階對碧虛

點點排空數行鴈

娟娟傍席一輪秋

風急蟬哀秋未晚

露濃山靜月初寒

金蟬樹杪催鴻急

玉露宵分並月圓

氣肅促金蟬自鳴曉葉

夜深看玉兔欲斂秋毫

貝闕溢清寒夜深瑤圃

金波流澗澆人在冰壺

青潭銜月規寒光上下

紫塞息雲陣遠色微茫

爽氣澄蘭沼先放玉英

秋風動桂林盡開金粟

黯淡夜分賓鴻已嘹唳

飄蕭秋半客燕轉呢喃

南極月同明堯年悠久

西成秋正肅舜旦光華

太液瑞虹流同占寶籙

建章華月上欲獻金莖

佳氣御筵凝祥符貫月

清光仙仗滿壽介承乾

閭闔月明中卿雲五色

蓬萊秋色裏仙樂九成

金氣肅高天共瞻南斗

玉華澄太宇齊拱北辰

警鶴度層雲欲棲珠樹

鳴蟬翻亂葉元耐金風

帝御丕基風雲歸吐納

皇揆初度月露湛清華

豐歲正秋成誕膺駿命

令辰當聖節光撫鴻圖

海晏河清四方歌舜日

星輝月彩萬里戴堯天

獻壽蓬壺北辰明瑞靄

張筵桂闕南斗爛光華

半夜寒霄空澗懸清影

一年圓月光輝在仲秋

天露迸空金掌濕冷浸蟾光

海風吹水玉輪高秋清夜氣

漸覺扶桑銀散彩影在西樓

忽看雲漢玉為盤光澄北闕

浴彩扶桑東闕初生疑帶濕

揚輝明漢中宵無翳更生妍

冰輪倒影入仙杯全吞秋色

金粟暗香飄合殿盡惹御衣

玻璃萬頃樽前颯颯不勝秋

鴻鴈一聲塞外蕭蕭渾欲暝

一夜清光黯黯野陰收朔漠

半秋爽氣澄澄天籟淨樓臺

月懸林麓夜千尺坐玩清虛

鴻唳關河秋一聲驚聞淒切
處處刀砧韻素秋秋來幾許
年年宮闕留明月月滿十分
秋敞廣寒雉堞龍樓飄練色
風搖碧落金蟾玉兔動毫光
秋容似水河山萬里入淒清
夜色如銀樓閣九重含煒燿
玉兔搗秋寒杵合丹應已就
金蟬咽曉風枝滴露不勝清
瑞彩一泓太液金波同皎潔

清光玉夜甘泉玉樹總分明
素關臨空水晶湛湛秋方永
冰輪出海銀漢迢迢夜未央
璇星貫月碧霄秋景現重輪
華渚流虹丹殿卿雲披瑞彩

代請祀周濂溪先生于石鼓呈

呈乞舉曠典祀先賢以倡風教事竊照石鼓書院為
一郡諸生瞻仰講肄之地濂溪周先生敦頤實衡陽
龍圖鄭公珣撫育之甥載於郡志先賢堂記中叙述
甚悉本有的據先賢所嘗鼓篋而遊淵源有自尚宜

專祠查得書院內先經奉有韓昌黎先生朱晦菴先生張南軒先生之像而濂溪先生乃不得俎豆其間此士人所以咨嗟曠典尤當亟舉者也伏乞准呈轉詳行縣肖像立主與二三先生同祠並祀則蘋藻趨蹌凜圖書而在目春秋祇對挹光霽於當時興起易於首善之邦鼓舞速於鄉哲之存矣

代請祀天津程公於鄉賢祠呈

呈乞崇祀真賢以倡後學以禪風教事本縣槐塘里人程弘忠初以布衣未為章句之學壯而因奮從遊心齋之門稟狂者進取之資明大學格物之旨驗心

於初醒乍睡而操行貞堅發理趣於雅唱微吟而神情粹朗角巾野服立鉅卿名公之間言出而衆皆聳聽坦衷古貌處良朋勝侶之上意合而又益信從氣剛而和語直而巽期友士於天下卒捐館於嶺南孳孳此學不因窘迫少離疊疊而談蓋亦研磨有素故沒則祭奠於天關書院同志資送以歸其殯近復追慕於衡州石鼓有司俎豆以欽其風此誠先輩之真品後學之人師所當舉祀賢祠以廣厲黌序者也為此呈乞批准行查申覆果於祀典有當冀幸立主入祠匹夫之善必收不以寒微未仕格分席之榮則

祠賢之意弗背莫不瞻仰盛舉興願學之念矣

紫園草卷十二終

